

Garzonen autoa AEKren aurka Erreakzioak

Paul Badiola • Donibane-
Lohizuneko auzapez ohia

«Ezinbesteko egitura da AEK»



►«AEK instituzio erabat ezinbestekoa da. Helduak euskara ikasi eta tokiko kulturaz jabetu daitezten, tresna ezin hobea da. Ez dut konprenitzen Hegoaldean gertatu dena. Oroitzen dut betidanik saiatu direla AEKren kontra egiten. 1989. urtean, Korrikan parte hartu nuelarik, zenbait arazo izan zituzten. Nire aldetik, AEK-k biziki lan ona egiten du Iparraldean, eta horiekin ez dago inolako arazorik».

Aingeru Epaltza • Idazlea
eta Nafarroako Ikastolen
presidentea

«Aurrekari txarra da euskalgintzarako»




►«Halako erakunde batek egiten duen lana auzitan jartzea arrunt aurrekari txarra da euskalgintzarako. Autoan erraten direnak epaitu gabe, nola aurkeztu den, zein memento aukeratu den, autoa bera susmopean jartzeko arrazoi aski ematen digu. Horrek gogoeta eragin behar du euskalgintzan, baina gogoe-ta horrek, hala ere, haratago egin beharko luke. Espainiako erakunde publikoek jarrera oldarkorra dute, eta hori aisatzen ari zaie, hemen zerbait gertatzen ari delako. Euskalgintzak gogoeta egin behar du borroka armatuari buruz, hori baita giro guztia gaiztotzen ari den faktorea. Eraso horiek guztiak ez lirarteke posible izaneko, borroka armatua ez balego, eta euskalgintzak adorea izan behar luke horretaz zerbait errateko».

Diego Garcia • Maratoilaria

«Euskararen kontra ari dira, Francoren diktaduran bezala»



►«Ez da Garzon bakarrik, Espainiako Gobernua ere ari da euskaldunon kontra, euskararen kontra eta, ñabardura txiki batzuekin, denen kontra. Euskaldunentzat oraindik frankista gogor asko dago. Bestetik, botoak alde dauz-



GARI GARAIALDE

Iazko Korrika, Hernanitik igaro zenean.

kate, PPkoak eta PSOEkoak, eta Euskal Herrian bizi den jendea ere espainolismoaren multzoan sartu nahi dute. Orain AEKren aurka sartu da, diktadura batekin, Francoren diktaduran bezala».

Jose Mari Satrustegi •
Euskaltzaina

«Baldin ez bada egia, irain handi bat dago, eta auzitara eramanen nuke jaun hori»



►«AEKren kontuetan ez dut hartu emanik, eta horretan ez naiz sartuko. Baina jakinik zer epaile dugun Garzon jauna, garaia iritsi da, baldin AEK-k garbi baditu bere kontuak eta aurre eman badezake, Garzon jaunari bere protagonismo, arinkeria eta zerrikeria ho-

riekin aurre egiteko. Alegia, bistan dago ez baldin bada egia irain handi bat dela, eta ez nuke utziko eta auzitara eramanen nuke jaun hori, eta txantxarik gabe. Itsu-itsuan hitz egiten dut, ez baitakit ezer, baina baldin berek ikusten badute, epaimahaira eraman behar dute».

Daniel Gestin • CGTKo
Donibaneko Postako ordezkaria

«Oraingoan lodiegia da irentsarazi nahi dugutena»

►«Ez da onargarria halakorik egin dezaten. AEK-ko ikasle ohia naiz, eta segurtasun deza-ket AEK-ko klaseetara euskara ikastera joaten ginela, eta AEKren helburua euskara hedatzea dela. Oraingoan irentsarazi nahi dugutena lodiegia da. Egun euskara edo euskal kultura den guztia ETA dela sine-

tsarazi nahi digute. Euskal kultur elkarte guztiei bizirik irauteko medioak moztu nahi dizkiete, baina hori ez dezakegu onar. Iparraldean horren salatzeke ekimenak egiten badira, ni prest naiz bat egiteko».

Jean Lissar • IU
«Ez du laguntzen bake bidean»



►«Ez dut ongi ezagutzen dosierra, baina erraten ahal dut AEK-k bere lana egiten duela behar den bezala. Beste eskualdean ez dakit zer den errealitatea, baina argi da ez dela horrela kriminalizatzen ahal. Halako gertakizunek ez dute bake biderik laguntzen. Jadanik gertatu dira halako erabakiak bertze erakunde

batzuen kontra. Hemendik zaila da konprenitzea zerk motibatu duen jujearen erabakia».

Sagrario Aleman • Arturo
Kampion euskaltegiko
zuzendaria

«Gure esku dago neurri batean horri aurre egitea»



►«Euskal kulturarekin eta euskararekin zerk usia duen oro kriminalizatu nahi da. Espainiako Gobernuaren ikuspegia ez den guztia kriminalizatu nahi da. Garzonek daraman bide honekin, eta batez ere Gobernuak berak behin eta berriz errepikatzen duenarekin, gaur egun Euskal Herriaren defentsa egitea edozein mailatan edo arlotan ETAKoa izatea da. AEKrena aspalditik zeterren, baina orain gogor eta zuzen-zuzenean sartu da. AEK-ko kide batzuk kriminalizatzen ditu, ETAKo partaide direla esanez. Elkartasuna adierazteaz gain, erantzuna euskalgintzako guztion artean egin behar dugu. Horretaz, Kontseiluan bilera egin behar da bihar [gaur]. Pentsatzen dut gauza ez dela hemen bukatuko eta beste hainbat eraso izanzen direla, erasoak areagotzen ari direlako. Edozer espero daiteke, eta gure esku dago neurri batean horri aurre egitea».

Paco Sagarzazu • Aktorea

«Ikusten da Madrilen zerbait antolatuta dagoela euskal kutsua duen ororen aurka»



►«Ikusten da zerbait antolatuta dagoela euskal kutsua duen ororen kontra Madrilen, PPk, PSOEek eta abar. AEKren auzia ez dut ongi ezagutzen, baina uste dut bada-kidala Garzonen pentsaera nondik nora doan, baina AEKrekin sartzen ari dela jakite hutsak urduri jartzen du. Irratia entzutean, konturatzen naiz zer-nolako iritziak ateratzen dira Euskadiri buruz, eta alde batera lerratuak daude erabat. Garzonena ere bide beretik joango dela pentsatzen dut. Ez dut ulertzen zer nahi duten, baina asko haserre-tzen nau».